

四庫全書

子部

欽定四庫全書

子部
古今事文類聚續集卷十五

詳校官中書臣孫衡

侍讀臣孫球覆勘

總校官編修臣王燕緒

校對官中書臣潘奕雋

膳錄監生臣俞昌言

欽定四庫全書

古今事文類聚續集卷十五

宋 祝穆 撰

燕飲部

罰飲 酒令

羣書要語觴其不敬者

禮周

兕觥其觶注罰爵也觶然不

用

桑

凡此飲酒或醉或否既立之監或佐之史彼醉不

臧不醉反耻式勿從謂無俾太怠匪言勿言匪由勿語

由醉之言俾出童殺三爵不識矧敢多又

宿之初筵

詩句明當罰二子已洗兩玉舟

坡全篇見飲器門

百罰深盃亦

不辭

杜

快須飲此勿復辭何用區區較醒醉

坡

好詩惡

韻應難和刻燭應須便置觥

古今事實

揖遜而飲

子曰君子無所爭必也射乎揖讓而升下而飲其爭也

君子

揚觶而酌

智悼子卒未葬晉平公飲酒師曠李調侍鼓鐘杜蕢入

寢酌曰曠飲斯又酌曰調飲斯又酌堂上北面坐飲之

降趨而出

三酌皆罰

平公呼而進之曰蕢曩者爾心或開予

是以不與爾言爾飲曠何也曰子卯不樂

紂以甲子死桀以乙卯亡

王者謂之疾日不以舉樂所以自戒懼

知悼子在堂斯其為子卯也大矣

言大臣喪重於疾日也

曠也太師也不以詔是以飲之也

師典秦樂爾

飲調何也曰調也君之褻臣也為一飲一食忘君之疾

是以飲之也

言諷貪酒食褻近也近臣亦當視君疾憂

爾飲何也曰蕢也宰

夫也非刀匕是共又敢與知防是以飲之也

防禁放溢

公曰

寡人亦有過焉酌而飲寡人杜蕢洗而揚解公曰如我死則必無廢斯爵也遂謂之杜舉

浮以太白

以下係酒令

魏文侯與大夫飲使公乘不仁為觴政曰飲若不盡浮之太白文侯不盡公乘不仁舉白浮君也

遣令棄酒

齊桓公置酒令曰後者飲一經程管仲後當飲一經程而棄其半公曰何也曰臣入口者舌出舌出者棄身與其棄身不寧棄酒乎公曰善

酒令起東漢

言者酒令名卷白波起於東漢擒白波賊如席卷故酒席言之以快人事

習字令

後魏孝文帝會群臣酒酣帝舉卮曰三三橫兩兩縱誰

能辨之賜金鍾彭城王勰曰此是習字

酒後爭令

元相公在浙東賓幙有薛書記酒後爭令以酒器擲傷公猶子遂出幕作十離詩以獻

薛濤改酒令

高駢鎮成都命酒佐薛濤改一字令曰須得一字象形又須逐韻公曰口有似沒梁斗濤曰川有似三條椽公曰奈何一條曲濤曰相公為西川節度尚使一沒梁斗

至於窮酒佐有三條椽內一條曲又何足恠

丁用晦
芝田錄

古今文集

雜著

以下係酒令

招手令

皇甫嵩

亞其虎膺謂手掌曲其松根謂指節以蹲鴟間虎膺之下蹲鴟大指也以鉤戟差玉柱之旁鉤戟頭指玉柱中指也潛虬闕玉柱三分潛虬無名指也奇兵闕潛虬一寸奇兵小指也死其三洛謂騷其腕也生其五峯通呼

五指也

類說

詩話

酒令屬對

唐人飲酒必為令以佐歡其變不一樂天所謂閑徵雅令窮經史韓退之令徵前事為之今猶有其遺習也嘗有人舉令云馬援以馬革裹屍死而後已答者乃云李耳以李樹為姓生而知之又鉏麋觸槐死作木邊之鬼答者以豫讓吞炭終為山下之灰皆可謂精的也復有

舉經句字相屬而文重者曰火炎崑岡乃有土圭測景
酬之此亦不可多得也

蔡寬夫詩話

松子搏拳

孔常甫言唐人詩有云城頭推鼓傳花板席上搏拳握

松子乃知酒席藏閹為戲其來久

東臯雜錄

酣飲

羣書要語困于酒食

困卦

有孚于飲酒濡其首亦不知節

也

未濟

甘酒嗜音未或不亡

五子之歌

敢有酣歌于室時謂巫

風

伊訓

賓之初筵溫溫其恭其未醉止威儀反反曰既醉

止威儀幡幡舍其坐遷屢舞僊僊賓既醉止載號載呶

亂我邁豆屢舞僊僊是白既醉不知其郵側弁之俄屢

舞僊僊

賓筵

醉者墮車雖疾不死彼得全於酒猶若是況

全於天乎

莊達生

唯酒無量不及亂

語

昔之飲酒有揖讓

而酬酢百拜以為禮者有叫號屢舞如沸如羹以為極

者有裸程袒裼以為達者有資絲竹金石之樂以為和

者以有數促糾逖而為密者

文柳

詩句誰能更拘束爛醉是生涯杜將何謝青春醉飲三

百盃杜三盃容小阮醉後發顛狂李我醉都不知但覺

紅綠敗坡不當愛一醉倒倩路人扶山谷先拚一飲醉如

泥杜莫思身外無窮事且盡生前有限盃杜共成一百

七十歲各醉三萬六千場坡

古今事實

義和酒淫

義和酒淫廢時亂日屑往征之

以酒為池

紂好酒淫樂戲於沙丘以酒為池以肉為林為長夜之
飲百姓怨望

史

千鍾百榼

昔平原君與子高飲強子高酒曰昔有遺諺堯舜千鍾
孔子百斛子路嗑嗑尚飲百榼古之賢聖無不能飲也
吾子何辭焉子高曰以子所聞聖賢以道德兼人未聞
以飲也平原君曰即如先生言則此言何生子高曰生

於嗜酒者蓋以勸勵之辭非實然也

子孔叢

聚酒積麴

子產有兄曰公孫朝好酒朝之室也聚酒千鍾積麴成封糟漿之氣逆於人鼻方其荒於酒也不知世道之安危人理之悔吝

滅燭牽衣

平原君夜飲燭滅客牽美人衣美人絕其纓

窟室夜飲

鄭伯有嗜酒為窟室壑谷夜飲而擊鍾為子皙所焚

左

未卜其夜

桓公樂飲以火繼之敬仲辭曰臣卜其晝未卜其夜

進熱啜

趙襄子與代王飲陰告厨人曰即酒酣樂進熱啜

史張儀傳

能飲一石

威王問淳于髡曰先生能飲幾何而醉髡曰賜酒大王之前執法在旁御史在後恐懼俯伏不過一斗徑醉矣

若親有嚴客奉觴上壽不過二斗若朋友交遊久不相
見卒然相睹歡然道故私情相飲可五六斗若乃州閭
之會男女雜坐陸博投壺相引為曹握手無罰目眙不
禁此可飲八斗日暮酒闌合尊促席男女同席烏履交
錯堂上燭滅主留髡而送客羅襦襟解微聞薜澤當此
之時髡心最樂能飲一石故曰酒極則亂樂極則悲以
諷諫焉齊王曰善乃罷長夜之飲

史記

日飲無何

漢袁盎遷吳相盎兄子種謂曰吳王驕日久國多奸今
絲欲刻治彼不上書告君則劍刺君矣南方卑濕絲
能日飲亡何說王母反而已如此幸得脫盎用其計吳
王厚遇盎

吏舍歌呼

曹參代蕭何為相擇郡國吏謹厚者即召除為丞相史
吏言文刻深欲務聲名輒斥去之日夜飲酒卿大夫以
下吏及賓客見參不事事來者皆欲有言至者參輒飲

以醇酒度之欲有言復飲酒醉而後去終莫得開說相
舍後園近吏舍吏舍日飲歌呼從吏患之無如何廼請
參遊後園聞吏醉呼乃反取酒張坐飲大歌呼與相和
參子窋為中大夫惠帝恠參不治事謂窋曰女歸試從
容問乃父曰君為相國日飲無所請事何以憂天下窋
歸而諫參參怒而笞之至朝帝讓參參免冠謝曰高帝
與何定天下法令既明且陛下垂拱參等守職遵而勿
失不亦可乎帝曰善君休矣

本傳

灌夫罵座

漢田蚡為丞相娶燕王女為夫人詔宗室列侯皆往賀
魏其侯竇嬰欲與灌夫俱夫謝曰夫數以酒失過丞相
丞相今者與夫有隙嬰強與俱酒酣蚡起為壽坐皆避
席伏已嬰為壽獨故人避席餘半膝席夫行酒至蚡蚡
膝席曰不能滿觴夫怒因嬉笑曰將軍貴人也畢之蚡
不肯行酒至臨汝侯灌賢賢方與程不識耳語又不避
席夫怒罵曰平生毀程不識不直一錢今日長者為壽

迺欲效兒女曹咕囁耳語蚡曰程李俱東西宮衛尉今
衆辱程將軍仲孺獨不為李將軍地乎夫曰今日斬頭
陷胃何知程李蚡怒曰此吾驕灌夫罪也藉福起按夫
項令謝夫愈怒不肯順蚡召長史曰今日召宗室有詔
劾灌夫罵坐不敬得棄市罪

以醉失儀

東方朔嘗醉入殿中小遺殿上劾大不敬免為庶人
張安世為光祿勳郎有醉小便殿上主事白行法安世

曰何以知其非反水漿耶其掩人過如此

使酒難近

季布為河東守孝文時人言其賢者孝文召復有言其
勇使酒難近至留邸一月見罷

醉歸廢事

陳遵日出醉歸曹事數廢西曹以故事適之侍曹詣寺
舍白遵遵曰滿百乃相聞以故事有百適者斥

吐污車茵

丙吉字少卿馭吏嗜酒嘗從吉出醉嘔丞相車上西曹主吏白欲斥之吉曰以醉飽之失去士使此人將復何所容西曹地但忍之此不過污丞相車茵耳

次公酒狂

平恩侯許伯入第丞相御史將軍中二千石皆賀蓋寬饒不行許伯請之乃往從西階上東鄉特坐許伯自酌曰蓋君後至寬饒曰無多酌我我廼酒狂丞相魏侯笑曰次公醒而狂何必酒也坐者皆屬目卑下之酒酣樂

作長信少府擅長卿起舞為沐猴與狗鬪坐皆大笑寬
饒不悅仰視屋而歎曰美哉然富貴無常忽則易人如
此傳舍所閱多矣唯謹慎為得久君侯可不戒哉因起
趨出劾奏長信少府以列卿而沐猴舞失禮不敬上欲
罪少府許伯為謝良久上廼解

本傳

裸袒而飲

孝靈末常侍張讓子奉為太醫令與人飲酒輒去衣露
形為戲樂

典論

洛陽令郭珍家臣億每召客侍婢數十盛

裝飾羅縠披之裸袒其中使進酒

同上

以聖賢命名

魏太祖時禁酒人竊飲之故難言酒以白酒為聖人清

酒為賢人

魏

醉後欲殺

孫權既為吳主歡宴之末自起行酒虞翻伏地佯醉不起權大怒手拔劍欲擊之劉基抱權諫翻由是得免權

因勅自今酒後言殺皆不得殺也

吳志

强使多飲

孫皓每饗宴無不竟日坐席無能否率以七升為限雖
不悉入口皆澆灌取盡韋曜素飲酒不過二升初見禮
異時常為裁減或密賜茶茗以當酒至於寵衰更見逼
强輒以為罪又於酒後使侍臣難折公卿以嘲弄侵尅
發摘私短為歡笑

吳志

針驗醉醒

劉表設大針於杖端客有酒輒以刺之驗醉醒也

典論

酒五百斛

吳鄭泉字文淵嗜酒每云願得美酒滿五百斛船以四時甘脆置兩頭反覆飲之憊即住啖肴膳酒有升斗減隨即益之

時中聖人

徐邈字景山仕魏為尚書郎時禁酒而邈私飲沉醉趙達問以曹事邈曰中聖人達白之太祖怒鮮于輔進曰醉客謂酒清者為聖人濁者為賢人邈偶醉言耳後文

帝幸許昌問邈曰頗復中聖人否邈曰昔子反斃於穀陽御叔罰於飲酒臣嗜同二子不能自懲時復中之帝大笑曰名不虛立

得酒中趣

孟嘉好酣飲愈多不亂桓溫問嘉酒有何好而卿嗜之

嘉曰公未得酒中趣耳

本傳

得一老兵

謝奕嘗逼桓溫飲溫走入南康主門避之主曰君若無

狂司馬我何由得相見
奕遂攜酒就廳事
引溫一兵帥
共飲曰失一老兵得一老兵
亦何所恠
溫不之責

本傳

劉伶酣醉

劉伶縱酒或脫衣裸形在屋中人見譏之
伶曰我以天地為棟宇
屋室為禪衣
諸君何為入我禪中

世說常乘鹿車

攜一壺酒使人荷揜而隨之曰死便埋我

畢卓甕間

畢卓為吏部郎比舍郎釀熟卓夜至甕間盜飲為掌酒

者所縛且視之乃畢吏部遂引卓入宴於甕側致醉而去嘗謂人曰給酒湍數百斛船四時甘味置兩頭左手持蟹螯右手持酒盃拍浮酒船中便足了一生矣

倒着白接羅

山簡字季倫為荊州時出高陽池大醉而歸人歌曰時時能騎馬倒着白接羅

居喪飲酒

阮籍遭母憂在晉文王座進酒肉司隸何曾亦在座曰

明公方以孝理天下而阮籍以重哀顯於公座飲酒食肉宜流之海外以正風教文王曰嗣宗毀損如此君不能共憂之且有疾而飲酒食肉固喪禮也籍飲噉不輟神色自若步兵校尉缺厨中有貯酒數百斛籍乃求為步兵

騎馬似乘船

阮咸醉騎馬歌傾人皆指而笑曰箇老子騎馬如乘船行波浪中

羣豕共飲

諸阮皆能飲酒咸至宗人間共集不復用杯觴斟酌以大盆盛酒圍坐相向更飲時有羣豕來飲其酒咸直接去其上使共飲之

窺狗竇大叫

光逸字孟祖為胡毋輔之所器屬輔之與謝鯤阮放畢卓羊曼栢彞阮孚散髮裸袒閉室酣飲已累日逸將排戶入守者不聽逸便於戶外脫衣露頂於狗竇中窺之

而大呌輔之驚曰他人決不能爾必我孟祖也遽呼入
遂與飲不捨晝夜時人謂之八達

客飲腐脅

晉周顗在北時能飲酒一石及過江雖日醉每稱無對
偶有舊對從北來顗欣然出二石酒共飲各大醉及顗
醒使視客已腐脅而死

墮幘

庾敳字子嵩於東海王越坐顗然醉墮幘几上

飲人狂藥

長水校尉孫季舒嘗與石崇酣燕慢傲過度崇欲表免之裴楷聞之謂崇曰足下飲人狂藥責人正禮不亦乖

乎

楷傳

醉不廢事

孔顗為江夏內史性便酒每醉輒彌日不醒居常貧罄未嘗闕懷為府長史典籤諮事不呼前不敢前不令去不敢去雖醉日居多而明曉政事醉時判決未嘗有壅

衆咸云孔公一月二十九日醉勝世人一月二十九日醒也

夫妻嗜酒

沈文季出為吳興太守文季飲酒至五斗妻王氏飲亦至三斗常對食竟日而視事不廢

玉山頽

嵇康醉倒如玉山之將頽

道間酣飲

袁桀為丹陽尹嘗步屣白楊郊野間道遇一士大夫
便呼與飲酣明日此人謂被知頻到門下求進桀曰昨
飲酒無偶聊相要耳竟不與相見

飲諸將醇酒

晉羊祜鎮荊州每與吳人交兵尅日方戰不為掩襲之
計諸將欲進譎詐之策者輒以醇酒使不得言

不如一盃酒

張翰任心自樂不求當世或謂之曰卿乃可縱適一時

獨不為身後名耶答曰使我有身後名不如即時一盃酒時人貴其曠達

被髮裸弔

晉王忱字元達坦之子也性嗜酒一飲連月不醉每曰三日不飲便覺精神不相親婦父常有慘忱乘醉弔之婦父慟哭忱與客十餘人連臂被髮裸見而入繞之三匝而出

酒泉太守

晉有羗人姚馥字世芳充廐園每醉中好言王者興亡之事常云九河之水不足以漬麴蘖八藪之木不足以為薪蒸七澤之麋不足以充庖俎言渴於酒羣輩呼為渴羗武帝授以朝歌守馥願且為馬園時賜美酒以樂餘年帝曰朝歌紂之舊都地有酒池故使老羗不復呼渴固辭遷酒泉太守地有清池其味若酒馥乘醉拜受

焉

拾遺記

劇飲不亂

華歆能劇飲至石餘不亂常整其衣冠號曰華獨坐

將老糟丘

陳暄嗜酒兄子秀致書於暄友巢以諷諫暄聞與秀書
曰吾有此好已五十餘年汝以飲酒為非吾以不飲為
過昔周伯仁渡江唯三日醒吾不以為少鄭康成一飲
三百盃吾不以為多又曰江諮議有言酒猶兵也兵可
千日而不用不可一日而不備酒可千日而不飲不可
一飲而不醉美哉江公可與共論酒矣吾生平所願身

沒之後題吾墓曰陳故酒徒陳君之神道又云何水部
眼不識孟鑑吾不離瓢杓汝寧與何同日而醒與吾同
日而醉乎速營糟丘吾將老焉

以醉謁人

宋顏延之以醉謁何尚之尚之望見便陽眠延之發簾
熟視曰朽木難雕尚之謂左右曰此人醉甚可畏

唯宜飲酒

梁謝朓在郢為吳興守弟綸為尚書於征虜渚送朓指

淪口曰此中唯宜飲酒故淪以長酣為事

騶卒對飲

謝幾卿為宋尚書左丞嘗預游苑宴不得縱酒致醉及還因詣道邊酒壚停車褰幔脫衣換酒與車前騶卒對飲觀者如堵幾卿處之自若

清狂錄

裸飲遺溺

梁謝幾卿為尚書左丞於省閣裸飲及醉小遺下霑令史為南司所彈幾卿亦不介意

明月對飲

宋謝諲不妄交接有時酌曰入吾室者但有清風對吾飲者唯當明月

大樂有大苦

北齊王紘字師羅為領左右都督文宣與左右飲酒曰快哉大樂紘曰亦有大苦帝曰何苦紘曰長夜荒飲不悟國破是謂大苦帝默然

夜分決事

崔咸累遷陝虢觀察使日與賓客僚屬痛飲未嘗醒夜
分決事裁剖精明無一毫差吏稱為神

醉中召見

李白字太白有詔供奉翰林白與酒徒醉于市帝坐沉香
亭意有欲得白為樂章召入而白已醉左右以水
類面嘗侍帝醉使高力士脫靴力士素貴耻之

自誌醉死

唐傅奕病未嘗問醫忽酣卧蹶然曰吾死矣乎即自誌

曰傅弈青山白雲人也以醉死嗚呼

出飲遭劾

劉伯芻遷主客員外郎數過友家飲噉為韋執誼所陰劾貶處州參軍

三升可戀

王績其飲至五斗不亂人有以酒邀者無貴賤輒往著五斗先生傳武德中詔徵以揚州六合縣丞待詔門下省時省官例日給良醞三升君弟名靜為武皇千牛謂

曰待詔可樂否君曰吾待詔祿俸殊為蕭瑟但良醞三升差可戀耳待詔江國公君之故人也聞之曰三升良醞未足以絆王先生判日給王待詔一斗時人號為斗酒學士貞觀中以家貧赴選時太樂有府吏焦革家善醞酒冠絕當時君苦求為太樂丞選司以非士職不授君再三請曰此中有深意且士庶清濁天下所安不聞莊周避漆園老聃耻柱下卒授焉數月而焦革死妻袁氏時送美酒歲餘袁又死君歎曰天乃不令吾飽美酒

遂掛冠歸田自是太樂丞為清流君葛巾聯牛躬耕東
臯自稱東臯子

酣飲取喻

鴻臚孔羣好飲酒王丞相謂云卿恒飲酒不見酒家覆
餅布日月久則糜爛羣曰公不見糟中肉乃更堪久

世說

曼卿豪飲

石曼卿喜豪飲與布衣劉潛為友嘗倅海陵潛訪之劇
飲中夜酒欲竭有醋斗餘乃傾入酒中併飲之明日酒

醋俱盡每與客痛飲露髮跣足着械而坐謂之囚飲坐
木杪謂之巢飲以藁束之引首出飲復就束謂之鰲飲
苑類

以妻間坐

竇卞與王永年接熟卞知深州永年為監押遂至通家
既而卞在京師永年求監金曜門書庫卞為干提舉監
司楊繪繪遂薦之既相親暱永年嘗置酒延卞繪於私
室出其妻間坐妻以左右手搦酒飲卞繪謂之白玉蓮

花杯其褻狎如此

東軒筆錄

古今文集

雜著

酒箴 諷諫成帝

楊雄

酒客難法度之士譬之於物曰子猶瓶矣觀瓶之居居井之眉處高臨深動常近危酒醪不入口藏水滿懷不

知左右牽於纏徽

井索也

一旦亟

上絹反縣也

礙為甕

丁浪反以甕為

楚所輶 音雷擊也

身提黃泉骨肉為泥自用如此不如鴟夷

韋囊國轉不盛酒鵠夷滑稽窮之狀如大壺盡日盛酒人復借酤

常為國器託於屬車天子屬車常載酒食出入兩宮經營公家繇

是言之酒何過乎

見陳
遵傳

能飲辯

文王飲酒千鍾孔子百觚聖人膏腹小大與人均等若
飲千鍾宜食百牛能飲百觚則能食十羊使文王身如
防風孔子身如長狄文王孔子率禮之人垂譽後世豈
千鍾百觚耶紂車行酒騎行炙以二十日為一夜按紂

以酒為池因車行酒以肉為林因為騎行炙耳或是覆
酒滂沱於池因以為池釀酒積糟因為丘懸肉似林因
言肉林耳

論衡

晉蔡謨贊

王回

晉自武帝酒色無度王公貴人競以酒色相侈而王愷
石崇尤甚愷使美人行勸客飲不盡輒殺美人崇常夜
飲諸少年酒裴綽乘醉竊卧崇妾中明日裴家遣車迎
綽綽上車馳去崇聞大怒立殺數妾將訟綽於朝綽兄

楷書請曰吾弟酒狂海內足知足下飲以狂藥而反責之禮耶崇方慕楷欲交之亦憚其辭乃止其後渡江諸君家往往尤襲故態紀瞻為尚書置酒請王導委觀妓瞻愛妾能歌新聲左僕射護軍周顗乘酒於衆中挑之而不得有司劾顗荒酒失儀元帝特詔宥焉是時在位蓋不以淫酗為貶如此蔡謨獨好禮自敕嘗詣丞相導導方作伎設床席謨不悅而去導亦不留客也謨曾孫廓廓子興宗仍以好禮自勅達於朝雖時淫暴不敢稍

侵媒人稱其家風贊曰

古者牀第之言不踰閭而賓主燕享以觀禮樂講仁義也烏有男女亡辨晝夜荒蕞群於禽獸而反以為樂歟此屠餘所以知中山之亡夫永嘉之亂又驗矣而渡江君臣猶不知以此相儆豈以風俗之敗為召亂之著者耶嗚呼迷哉而蔡氏出於其間獨能世學好禮達而不汚君子哉

酒德頌

劉伶

有大人先生以天地為一朝萬期為須臾日月為扃牖
八荒為庭除居無轍迹行無室廬幕天席地縱意所如
止則操卮執觚動則挈榼提壺惟酒是務焉知其餘有
貴介公子搢紳處士聞吾風聲議其所以乃奮袂攘襟
怒目切齒陳說禮法是非蜂起先生於是方捧甕承糟
銜盃嗽醪奮髯箕踞枕麴藉糟無思無慮其樂陶陶兀
然而醉恍爾而醒靜聽不聞雷霆之聲熟視不見泰山
之形不覺寒暑之切肌利欲之感情俯觀萬物擾擾焉

若江海之載浮萍二豪侍側焉如螺贏之與螟蛉

酒功讚

白居易

晉建威將軍劉伯倫嗜酒有酒德頌傳於世唐太子賓客白居易亦嗜酒作酒功讚以繼之其詞曰

麥麴之英米泉之精作合為酒孕和產靈孕和者何濁醪一樽霜天雪夜變寒為溫產靈者何清醕一酌離人遷客轉憂為樂納諸喉舌之內淳淳泄泄醅醕沆瀣沃諸心胃之中熙熙融融膏澤和風百慮齊息時乃之德

萬緣皆空時乃之功吾嘗終日不食終夜不寢以思無益不如且飲

醉鄉日月

皇甫嵩

凡醉有所宜醉花宜晝襲其光也醉雪宜夜清其思也醉得意宜唱宣其和也醉將離宜擊鉢壯其神也醉文人宜謹節奏章程畏其侮也醉俊人宜益觥盃加旗幟助其烈也醉樓宜暑資其清也醉水宜秋泛其爽也此皆審其宜攻其景反此則失飲之人矣

醉鄉記

王績

醉之鄉去中國不知其幾千里也其土曠然無涯無丘陵阪險其氣和平一揆無晦朔寒暑其俗大同無邑居聚落其人甚清無愛憎喜怒吸風飲露不食五穀其寢于于其行徐徐與鳥獸魚鱉雜處不知有舟車器械之用昔者黃帝氏嘗獲游其都歸而杳然喪其天下以為結繩之政已薄矣降及堯舜作為千鍾百壺之飲因姑射神人以假道蓋至其邊鄙終身太平禹湯立法禮繁

樂雜數十代與醉鄉隔其臣義和弃甲子而逃冀臻其
鄉失路而道夭故天下遂不寧至乎末孫桀紂怒而昇
其糟丘階級千仞南向而望卒不見醉鄉武王得志于
世乃命公旦立酒人氏之職典司五齊拓土七千里僅
為醉鄉達焉三十年刑措不用下逮幽厲迄乎秦漢中
國喪亂遂與醉鄉絕而臣下之愛道者往往竊至焉阮
嗣宗陶淵明等十數人並游於醉鄉沒身不返死葬其
壤中國以為酒仙云嗟乎醉鄉氏之俗豈古華胥氏之

國乎何其淳寂也如是余將游焉故為之記

送王含秀才序

韓愈

吾少時讀醉鄉記私恠隱居者無所累於世而猶有是言豈誠旨於味耶及讀阮籍陶潛詩然後乃知彼雖偃蹇不欲與世接然猶未能平其心或為事物是非相感發於是有託而逃焉者也若顏氏之操瓢與簞曾參歌聲若出金石彼得聖人而師之汲汲每若不可及其於外也固不暇尚何翹慕之託而昏冥之逃耶吾又以為

悲醉鄉之徒不遇也建中初天子嗣位有意正觀開元
之不績在朝廷之臣爭言事當此時醉鄉之後世又以
直廢吾既悲醉鄉之文詞而又嘉忠臣之烈思識其子
孫令子之來見我也無所挾吾猶張之况文與行不失
其世守渾然端且厚惜乎吾力不能振之而其言不見
信於世也於其行姑與之飲酒

書東臯子傳後

蘇子瞻

予終日飲酒不過五合天下之不能飲無在予下者然

喜人飲酒見客舉盃徐引則予胃中為之浩浩焉落落焉酣適之味乃過於客閒居未嘗一日無客客至未嘗不置酒天下之好飲亦無在予上者常以謂人之至樂莫若身無病而心無憂我則無是二者矣然人之有是者接於予前則予安得全其樂乎故所至常蓄善藥有求者則與之而尤喜釀酒以飲客或曰子無病而多蓄藥不飲而多釀酒勞已以為人何也予笑曰病者得藥吾為之體輕飲者困於酒吾為之酣適蓋專以自為也

東臯子待詔門下省日給酒三升其弟靜問曰待詔樂
乎曰待詔何所樂但美醞三升殊可戀耳今嶺南法不
禁酒予既得自釀月用米一斛得酒六斗而南雄廣惠
循梅五太守間復以酒遺予略計其所獲殆過於東臯
子矣然東臯子自謂五斗先生則日給三升救口不暇
安能及客乎若予者乃日有二升五合入野人道士腹
中矣東臯子與仲長子光游好養性服食預刻死日自
為墓誌予益友其人於千載或庶幾焉

飲酒說

蘇子瞻

陶潛云但恐多謬誤君當恕醉人此未醉時說也若已醉何暇憂誤哉然世人言醉時是醒時語此最名言張安道飲酒初不言盞數與劉潛石曼卿飲但言當飲幾日而已歐公盛年能飲百盞然常為安道所困聖俞亦能百許盞然醉輒高义手而語彌溫謹此亦知所不足而勉之非善飲者善飲者淡然與平時無少異若僕者又何其甚飲一盞而醉醉味與數君何異亦無所羨耳

夢渴賦

何 諷 英華

不宿食以晨飲困鍾盃以沉寢永春晝而高局墮幅巾
而橫枕及乎酒適喪腸神遊異方煙生喉古倘然如狂
爰瞰甃以窺汲諒不任於呼吸俄據河而俯瀆乃器舟
而杯斛倒魚鱉之窟宅見蛟龍之委伏猶胃腸之不決
資宴飲而未足由是奔九江走五湖手不暇於幹運心
不息於躊躇見波漸竭而百川如綫岸益高而底於將
枯腹慊爾而未覺肺燥然而不濡尋至大溟茫然連清

豈爾浩翰而吾量不盈斟酌未幾條見涯涘百靈稽首
乞留濡漑吾腹未充豈汝為意俄傾竭於浩渺奄滴瀝
而無漬瑤宮貝闕盡列平地三山赤城可以步至鯨鯨
噉喙相煦以四大鵬驚攫巨鰲愕眙四顧燥涸悒然興
情此情何奇非吾所知恨滄海之可罄不足充吾之所
思周遭有截塊然埽渠水府萬族咸呼帝闕帝且不聞
吾欲未竭方將尋蟻垤期耿恭問姜母以何在訪舒姑
而欲從辨夸父於渭上弔相如於臨邛萬計已盡六腑

如燼窻日斜照飛蚊遠鬢既驚既覺可歎可笑飲不盡
器枯腸已療播頤沉吟其意逾深以吾此日之一夢見
自古不足者之心

古詩

對酒

李白

天若不愛酒酒星不在天地若不愛酒地應無酒泉天
地既愛酒愛酒不愧天已聞清比聖復道濁如賢賢聖
既已飲何必求神仙三盃通大道一斗合自然但得酒

中趣勿為醒者傳

將進酒

李白

君不見黃河之水天上來奔流到海不復迴又不見高
堂明鏡悲白髮朝如青絲暮成雪人生得意須盡歡莫
使金樽空對月天生我材必有用千金散盡還復來烹
羊宰牛且為樂會須一飲三百盃岑夫子丹邱生將進
酒杯莫停與君歌一曲請君為我傾耳聽鍾鼎玉帛豈
足貴但願長醉不復醒古來賢聖皆寂寞唯有飲者留

其名陳王昔日宴平樂斗酒十千恣歡謔主人何用言
少錢且須沽酒對君酌五花馬千金裘呼兒將出換美
酒與爾同消萬斛愁

飲中八仙歌

杜甫

知章騎馬似乘船眼花落井水底眠汝陽三斗始朝天
道逢麴車口流涎恨不移封向酒泉左相日興費萬錢
飲如長鯨吸百川啣杯樂聖稱避賢宗之瀟洒美少年
舉觴白眼望青天皎如玉樹臨風前蘇晉長齋繡佛前

醉中往往愛逃禪李白一斗詩百篇長安市上酒家眠
天子呼來不上船自稱臣是酒中仙張旭三盃草聖傳
脫巾露頂王公前揮毫落紙如雲烟焦遂五斗方卓然
高談雄辨驚四筵

唐李適之罷相詩避賢初罷相樂聖且銜杯試
問門前客今朝幾箇來故子美詩蓋用此意

絕纓歌

李頎

楚王燕客章華臺章華美人善歌舞玉顏艷艷空相向

蒲堂目逆不得語紅燭滅芳酒闌羅衣半醉春夜寒絕
纓解帶為一歡君王赦過不之罪暗中珠翠鳴珊珊始
愛賢不愛色青蛾買死誰能識果却三軍全社稷

謝答聞善二兄絕句

黃魯直

黃聞善名友聞此篇大概以聞善與柳氏
兄弟杯酒相失為開廣之

身入醉鄉無畔岸心與歡伯為友朋更開罵座客星散
過午未蘇髮鬢髻未嘗頃刻可去酒無有一日不吟

詩詩狂克念作酒聖意美常思年少時 群猪過飲尚
可樂疥手輟甕庸何傷柳家兄弟大迫窄狂藥不容人
發狂 莫作叫號驚四鄰甕中有地可藏身淵明醉握
遠公手大笑絕倒人不嗔 阮籍醉睡不論婚劉伶雞
肋避尊拳至今凜凜有生氣飲酒真成不愧天 公擇
醉面桃花紅人百忤之無愠容莘老夜開傾數斗焚香
默坐日生東 推牀破面帳觸人作無義語怒四隣樽中
歡伯笑爾輩我本和氣如三春 陶令舍中有名酒無

日不為父老傾四坐歡欣觀酒德一燈明滅又詩成
阮籍劉伶智如海人間有道作糟丘酒中無諍真三昧
便要嵇康輸一籌

詩話

託酒遠

石林詩話云晉人多言飲酒有至沉醉者此未必意真
在於酒蓋方時艱難人各懼禍惟託於醉可以踈遠世
故蓋陳平曹參以來用此策漢書記陳平於劉呂未判

之際日飲醇酒戲婦人是豈真好飲耶曹參雖與此異然方欲解秦之煩苛付之清淨以酒杜人是亦一術不然如蒯通輩無事而獻說者且將日走其門矣流傳至嵇阮劉伶之徒遂全欲用此為保身之計此意惟顏延年知之故五君詠云劉伶善閉關懷情臧聞見韜精日沉飲誰知非荒宴如是飲者未必劇飲醉者未必真醉也後世不知此凡濡於酒者徃徃以嵇阮為例濡首腐脅亦何恨於死耶

隱漁

送酒曰唯

公燕合樂每酒行一終令人必唱唯酒然後樂作此唐人送酒之辭本作碎音今多為平聲文士亦或用之王仁裕詩淑景易從風雨去芳樽須用管絃唯

石林燕語

戒酒

羣書要語越庶國飲唯祀德將無醉酒

酒誥

矧汝剛制于酒

厥或誥曰群飲汝勿佚盡執拘以歸于周予其殺又惟殷之迪諸臣百工乃湏于酒勿庸殺之姑惟教之上

同不

為酒困語

詩句一爾平出處未嘗持酒盃歐中年畏病不舉酒孤

負春來數百觴山憤眠處士雲庵裏倦醉佳人錦瑟傍

坡復作騎驢不跨驢此生斷酒不須扶山谷

古今事實

不以淫繼

陳公子完奔齊桓公使為正卿辭使為工正飲桓公酒

樂公曰以火繼之辭曰臣卜其晝未卜其夜不敢君子

曰酒以成禮不繼以淫義也以君成禮弗納於淫仁也

莊二

以廢業斷

邴原舊能飲酒自行八九年酒不向口至陳留師韓子
臨歸師友以原不飲酒陳仲弓范仲博盧子幹會米肉
送原原曰本能飲但以荒思廢業斷之今遠別可盡飲
終日不醉

諫君戒飲

晉元帝頗以酒廢事王導以為言帝命酌引觴覆之於

此遂罷

本紀

亡親戒酒

陶侃每飲酒有定限常歡有餘而限已竭或勸更少進侃悽悵良久曰年少曾有酒失亡親見約故不敢踰

醉輒自杖

庾亮叔褒父在常戒褒以酒後每醉輒自責曰余廢先人之戒何以訓人乃於墓前自杖二十

臨別戒飲

諸葛樂與管輅別戒以二言卿性樂酒雖溫克然不可
保寧當節之卿有水鏡之才所見者妙禍如膏火可不
慎持卿散才以游於雲漢之間不憂不富貴也輅言酒
不可極才不可盡吾欲持酒以禮持才以愚何患之有

邪別
傳

告新莫飲

劉玄明為山陰令告新尹傳颺曰作縣唯日食一升飯
莫飲酒此為第一策

覆甌布爛

孔群性嗜酒導嘗戒之曰卿常飲不見酒家覆甌布日月久糜爛耶荅曰公不見肉糟淹更堪久耶

忍斷杯中物

吳衍好飲後醉詬權貴遂戒飲阮宣命飲衍曰近斷飲宣以拳歐其背曰看看老癖癡漢忍斷杯中物耶抑而飲之

囚酒星

衛元規酒後忤丁僕射以書謝曰自茲因酒星於天獄

焚醉目於秦坑

撫言

誑妻戒酒

劉伶嘗渴甚求酒於其妻妻捐酒毀器涕泣諫曰君酒
太過非攝生之道必宜斷之伶曰善吾不能自禁惟當
祝鬼神自誓耳往可具酒肉妻從之伶跪祝曰天生劉
伶以酒為名一飲一石五斗解醒婦人之言慎不可聽
仍引酒御肉塊然復醉

欲言即飲

唐陽城為諫議大夫八年未肯去方日夜劇飲客欲諫止者城揣知其情強飲客客辭即自飲滿客不得已與酬酢或醉仆席中或先醉卧客懷中不能聽客語

帝戒其飲

石延年字曼卿宋真宗曰朕知卿有才久矣但聞卿好飲酒恐醉不能了事延年曰臣非好飲酒蓋以自釋耳然臣雖醉其於臨事愈於不醉之人

友戒其飲

張文忠公喜酒飲量過人既登第通判濟州日飲醇酎
往往至醉是時太夫人年已高頗憂之一日山東賈存
道先生過濟文忠館之數日先生愛文忠之賢慮其以
酒廢學生疾乃為詩示文忠曰聖君恩重龍頭選慈母
年高鶴髮垂君寵母恩俱未報酒如成病悔何追文忠
矍然起謝之自是非親客不對酒終身未嘗至醉

古今文集

雜著

斷酒誡

庾闡

蓋神明智惠人之所以靈也好惡情欲人之所以生也
明智運於常涯好欲安於自然吾以知窮智之害性任
欲之喪真於是椎金壘碎玉椀破兕觥捐觚瓚

家誡

魏王肅

夫酒所以行禮養性命歡樂也過則為患不可不慎是
故賓主百拜終日飲酒而不得醉先王所以避酒禍也

凡為主人飲客使有酒色而已無使至醉若為人所強
必退席長跪稱父戒以辭之敬仲辭君而況於人乎為
客又不得唱造酒史也若為人所屬下坐行酒隨其多
少犯令行罰示有酒而已無使多也禍變之興常於此
作所宜深慎

酒箴并序

皮日休

皮子性嗜酒雖行止窮泰非酒不能適居襄陽之鹿門
山以山稅之餘繼日而釀終年荒醉自戲曰醉士居襄

陽之洞湖以船舶載醇酎一甌往來湖上遇興將酌因
自諧曰酒民於戲吾性至荒而嗜於此其亦為聖哲之
罪人也又自戲曰醉士自諧曰酒民將天地至廣不能
容醉士酒民哉又何必廁絲竹之筵粉黛之座也襄陽
元侯聞醉士酒民之稱訂皮子曰子耽飲之性於喧靜
豈異耶皮子曰酒之道豈止於充口腹樂悲歡而已哉
甚則化上為淫溺化下為凶醜是以聖人節之以酬酢
喻之以誥訓然尚有上為淫溺所化化為亡國下為凶

酖所化化為殺身且不見前世之飲禍耶潞鄆舒有五
罪其一嗜酒為晉所殺慶封易內而耽飲則國朝遷伯
有窟室而耽酒終奔於駟氏之甲藥高嗜酒而信內卒
敗於陳鮑氏衛侯飲于藉圃卒為大夫所惡嗚呼吾不
賢者性實嗜酒尚懼為鄆舒之僂過此吾不為也又焉
得俾喧為靜乎俾靜為喧乎不為靜中淫溺乎不為酖
禍之波乎既淫溺酖禍作為心得不為慶封乎伯有乎
藥高乎衛侯乎蓋中性不能自節因箴以自符箴曰

酒之所樂樂其全真寧能我醉不醉於人

古詩

止酒

陶潛

居止次城邑逍遙自閑止坐止高蔭下步止華門裏好
味止園葵大歡止稚子平生不止酒止酒情無喜暮止
不安寢晨止不能起日日欲止之營衛止不理徒知止
不樂未信止利已姑覺止為善今朝真止矣從此一止
去將止扶桑俟清顏止宿容奚止千萬祀

諸公和淵明止酒詩因同賦

陳去非

愛河漂一世既溺不能止不如淡生活吟詩北窓裏肺
肝亦何罪因此毛錐子不如友麴生是子差可喜三杯
取徑醉萬緒散莫起柰何劉伶婦告語見料理不如一
覺睡浩然忘彼已三十六策中此策信高矣政使江變
酒誓不涉其涖尚須學王通藝黍供祭祀

止酒

張安國

飲酒見真性此酒不可止一飲病三日止酒寧獲已飲
酒有別腸勸酒無惡意既因酒成疾那識酒真味將軍
醉不敬次公醒而狂破面長觸人不如持空觴人言我
止酒似是遣客計但使客常滿客醉我亦醉

律詩

陳述古以詩見責屢不赴會復次韻

蘇子瞻

我生孤獨本無鄰老病年來益自珍肯對紅裙辭白酒

但愁新進笑陳人
北山怨鶴休驚夜
南畝巾車欲及辰
多謝清詩屢推轂
脂膏那解轉方輪

詩餘

沁園春

見詞曲門



古今事文類聚續集卷十五

欽定四庫全書

子部

古今事文類聚續集卷十六

詳校官中書臣孫衡

侍讀臣孫球覆勘

總校官編修臣王燕緒

校對官中書臣潘奕雋

謄錄監生臣陳太初

欽定四庫全書

古今事文類聚續集卷十六

食物部

飯

粥羹

羣書要語饋餽稔也脩食飯也餽蒸飯氣也

說文

水澆飯

曰飧

通俗文

飲食男女人之大欲存焉

禮運

民之質矣日用

飲食

天保

一簞食一豆羹得之則生弗得則死噉爾而與

之行道之人弗受蹴爾而與之乞人不屑也

告子

八政以

食為首

前食貨志

人情一日不再食則饑

同上

主人為臣炊雕

胡之飯

宋王賦

羹臠肉羹

說文

臠蒿也香氣也

釋名

大羹不和

注肉汁也

記

羹之有菜者用挾

曲禮

懲於羹者而吹虀

楚詞

詩句飯抄雲子白

杜

新炊間黃粱

杜

嘗新破旅顏

杜

嘗

擬報一飯

杜

滑喜雕胡飯

杜

粥擔橐以取薪斧冰持作

糜

魏武帝苦寒行

羹勸客駝蹄羹霜橙壓香橘

杜

誰欲討蓴羹

杜

魏客茹蓴羹

杜

為爾致羊羹

杜

莫將北海金虀膾輕

比東坡玉糝羹

坡

乾鍋更刮甘瓠羹

坡

古今事實

蒸穀為飯

黃帝始蒸穀為飯烹穀為粥

周書

又云始有釜甑火食

古史

考

埃墮飯中

子在陳絕糧從者病

語十五

孔子厄於陳蔡從者七日不

食子貢以所賁貨竊犯圍而出告糴於野人得米一石

焉顏回仲由炊之於壞屋之下有埃墨墮飯中顏回取而食之子貢自井望見之問曰仁人廉士窮改節乎回曰改節即何稱於仁廉哉子貢以所飯告孔子子曰吾將問之召顏淵曰疇昔子夢見先人豈或啓佑我哉子炊而進飯吾將祭焉對曰有埃墨墮飯中欲置之則不潔欲棄之則可惜回即食之不可祭也孔子曰然乎吾亦食之

家語

疏食而樂

孔子曰飯蔬食飲水曲肱而枕之樂亦在其中矣

食我以禮

孔子曰吾食於少施氏而飽少施氏食我以禮

二旬九食

孔子居於衛緼袍無裏二旬九食田子方聞之使人遺狐白之裘

一簞食

顏子一簞食一瓢飲在陋巷人不堪其憂回也不改其

樂

殺鷄為黍

荷蓀丈人止子路宿殺鷄為黍而食之

裹飯往食

子輿與子桑為友霖雨十日子輿曰子桑殆病矣裹飯

往食之

莊子

與之簞食

趙宣子見翳桑餓人與之簞食靈輒也

詳見報德門

戒二子食

衛獻公戒孫文子甯惠子食皆服而朝日旰不召而射
鴻于圃二子從之不釋皮冠而與之言二子怒

左

不食嗟來

齊大饑黔敖為粥於路以待餓者而食之有餓者蒙袂
輯屣貿貿然來黔敖左奉食右執飲曰嗟來食揚其目
而視之曰予唯不食嗟來之食以至於斯也從而謝焉
終不食而死曾子聞之曰微與其嗟也可去其謝也可

食

食脫粟飯

晏子相齊食脫粟飯

晏子春秋

公孫弘為丞相食一肉脫粟

之飯

食粟而已

曹交九尺四寸以長食粟而已

孟子

遺粟而辭

子列子窮容貌有饑色客有言之鄭子陽者曰列禦寇

盖有道之士也子陽遺之粟子列子再拜而辭

列子

班荆而食

楚伍舉將奔晉聲子將如晉遇之於鄭郊班荆相與食

左

吹竽乞食

伍子胥夜行晝伏吹竽乞食於吳市

糲飯菜羹

孫叔敖為令尹糲飯菜羹

疑飯異等

孟嘗君待客夜食有人蔽火光客怒以為飯不等輟食
辭去孟嘗君起自持其飯比之客慙自刎

令馬食之

范睢坐須賈堂下令兩黥徒夾而馬食之

食貴於玉

蘇秦之楚三日乃得見王辭去王曰曾不少留對曰楚
國食貴於玉薪貴於桂謁者難得見如鬼王難得見如

天令臣食王炊桂因鬼見帝王曰聞命矣

戰國策

漂母飯信

韓信常數從其下鄉南昌亭長寄食數月亭長患之乃晨炊蓐食信食時往不為具食信亦知其意怒竟絕乃釣城下諸母漂有一母見信饑為設食信謂漂母曰吾必有以重報母母怒曰丈夫不能自食吾哀王孫而進食豈望報乎

老尚善飯

見老門

不食盜食

東方有士曰爰旌目將有適而餓於道狐父之盜人丘也見而下壺餐以饋之爰旌目三饋而後能視曰子何為者也曰我狐父之人丘也爰旌目曰嘻汝非盜耶胡為而食我兩手據地而嘔之不出喀喀然遂伏而死

新序

俱過一飯

薛宣守左馮翊高陵令楊湛櫟陽令謝游皆貪猾不遜持郡短長及宣視事詣府謁宣設酒飯與相對接待甚

備已而陰求其罪贓具得所受取密以手書曉之湛卽
時解印去游以大儒輕宣宣移書顯責之游得檄亦解
印綬去

進麥飯

王郎起光武至南宮遇大風雨引車入道傍空舍馮異
抱薪鄧禹爇火光武對竈燎衣異進麥飯兔肩

飯各有異

左雄為異州刺史常食乾飯 司馬苞為太尉常食漚

飯 李固為太尉常食麥飯

出漢書

珍饌供母

見母子門

有時絕粒

范丹所居單陋有時絕粒閭里歌之曰甑中生塵范史雲釜中生魚范某蕪

與語忘食

尹敏與班彪相厚每相與談常晏暮不食晝即至瞑夜

徹旦

東觀漢記

孫安國往殷中軍許共論往反精苦賓主遂

至暮忘食

世說

留飯禮薄

步騭避亂江東與廣陵衛旌相善俱以種瓜自給會稽
焦征羗郡之豪族騭與旌寄食其地懼為所侵乃共脩
刺奉瓜以獻征羗方內卧駐之移時旌欲去騭止之曰
本所以來畏其強也今舍去欲以為高祗怨耳良久征
羗開牖見之隱几坐帳中設席致地坐騭旌牖外旌愈
耻之騭辭色自若征羗身自享大案餼膳重沓而小盤

飯與隲旌惟菜茹而已旌不能食隲極飡致飽乃辭出旌怒隲曰能忍此乎隲曰吾等貧賤是以主人以貧賤遇之固其宜也當何所耻

吳志

食折米飯

王朗會稽敗太祖盛會喟之曰不能效君昔在會稽折粳米飯朗曰宜適難值如朗者未可折而折明公可折而不折也

魏畧

飯化為螺

石崇家稻米飯在地經宿皆化為螺時人以為族滅之
應

拾飯粒啗

殷仲堪在荊州連年饑饉仲堪食常五椀盤餘肴饌飯
粒落席間輒拾以啗之雖欲率物亦緣其性真素也

晉書

含飯哺兒

郗鑒遭永嘉喪亂窮餓鄉人共飴之鑒常携兄子外甥
周翼二小兒會食鄉人曰各自窮餒以君之賢共欲存

君耳恐不能兼飴鑒於是獨往飯着兩頰還吐與二兒
食

精飯食客

謝安嘗欲詣陸納納兄子倅密作食供之納設茶果而
已倅下精飯食客納大怒杖四十曰不能先我叔父而
乃穢我素風

食冷復暖

孫盛嘗詣殷浩談論對食奮擲麈尾毛悉落飯中食冷

而復暖者數四至暮忘冷理竟不定由是知名

本傳

食鎗底飯

宋陳遺少為縣吏母好食鎗底飯遺在役恒帶一囊每煮食輒錄其焦貽母

母為設食

湘州刺史王僧虔引樂頤之為主簿以同僚非人棄官去吏部郎庾景之嘗往候頤之為設食唯枯魚菜蘆景之曰我不能食母聞之自出常膳魚羹數種景曰卿過

於茅季偉我非郭林宗

不過兄飯

第五倫字伯魚脩行清白嘗召見上曰聞卿為吏不過從兄飯寧有之耶對曰臣生遭饑饉米石萬錢不敢妄過人飯

道上共食

陽城為道州日炊米二斛魚一大鰲置杯杓道上共食

之六

帖

不暇擇美食

唐乾符中有豪士承藉勲蔭錦衣玉食極口腹之欲嘗謂門僧聖剛曰凡以炭炊飯先燒令熟謂之鍊火方可入爨不然猶有煙氣難餐及大冠先陷漚洛財產剽盡昆仲數人與聖剛同竄潜伏山草不食者三日賊鋒稍退徒步往河橋道中小店買脫粟飯於土杯同食美於梁肉僧笑曰此非鍊炭所炊但慙覩無對

康駢劇談錄

衣冠而食

張文定公安道平生未嘗不衣冠而食嘗暑月與其壻
王鞏同飯命鞏褫帶而已衫帽自如鞏不敢公曰吾自
布衣諸生遭遇至此一飯皆君賜也享君之賜敢不敬
乎子自食某之食雖袷衣無害也

飯後不拜

章惇少善養生嘗云遇饑雖不相識處亦須索飯若食

飽時見爺亦不拜

東軒
筆錄

食飽即寢

杜邠飲食洪博既飽即寢人有諫非攝生之理公曰君
不見布袋盛米放倒即慢

南部
新書

飲啖兼人

韓玉汝平生喜饕餮傳一飲啖可兼數人出帥長安錢
穆甫行詞云喜廉頗之能飯玉汝不悅

聞見
錄

啜粥聲聞

以下
係粥

尹吉甫仕至上卿其家大富食口數百人時歲大饑曾
鼎鑊作粥啜聲聞數里食訖失三十人乃在鑊中齧取

燠粥而已

錄異

為粥待餓

見飯門

田足供粥

顏回有負郭之田五十畝足以供饘粥

進豆粥

光武自薊東南馳至饒陽蕪蕪亭天寒衆皆饑疲馮異上豆粥明旦光武曰昨得公孫豆粥饑寒俱解

炊飯成糜

有客詣陳太丘談鋒甚敏太丘乃令元方季方炊飯太丘問炊何遲留元方長跪曰君與客語乃共竊聽炊忘着簞今皆成糜太丘曰爾頗有所識否二子長跪俱說言無遺失太丘曰如此俱成糜自可何必飯耶

世說

進粥三呵

郭林宗嘗止陳國閭學見童子魏德公知其有異德公求近其房止供給洒掃林宗嘗不佳夜中命作粥林宗一啜怒而訶之曰高明為長者作粥使沙不可食以杯

擿地德公更進粥三進三呵德公無變容顏色殊悅林宗曰始見子之面今乃知子之心遂友善之卒為佳士

本傳

肉糜

晉惠帝時天下荒亂百姓餓死帝曰何不食肉糜

咄嗟辦粥

石崇作豆粥咄嗟便辦每冬得韭萍薺王愷密問其帳下云豆至難熟豫作熟豆客來但作白粥投之韭萍薺

是擣韭根雜以麥苗耳

暑暑衣食粥

却嘉賓三伏之月詣謝公炎暑重赫雖當風交扇猶沾
汗流離謝着故衣食熱白粥却謂謝曰自非君體幾不

堪此

世說

歲荒散粥

梁任昉為義興太守歲荒散私俸以米豆為粥活三千
餘人

斟雉羹

以下係羹

楚辭云彭鏗斟雉帝何饗王逸注曰彭鏗彭祖也好和滋味蓋斟雉羹事帝堯

熊羹不熟

紂王怒熊羹不熟而殺庖人

劉向新序

烹子遺羹

文王長子伯邑考紂烹以為羹以賜文王曰聖人不食其子羹文王得而食之曰誰謂西伯聖者與食其子羹

而不知

世紀

藜羹不糝

孔子厄陳蔡之間七日不食藜羹不糝

以羹遺母

穎考叔曰小人有母皆嘗小人之食矣未嘗君之羹請以遺之

殺羊食士

鄭伐宋宋將戰華元殺羊食士其御者羊斟不與焉及

戰曰昔之羊羹子為政今日之事我為政興華元馳入

鄭宋師敗績

說苑

染指黿羹

見門

烹子遺羹

樂羊圍中山中山人烹其子遺之羹樂羊食盡褚師贊

曰其子食之其誰不食羊下中山文侯賞其功而疑其

心

戰國策

羊飡亡國

中山君饗士司馬子期在焉羊羹不遍子期怒走楚說
王伐中山中山君亡有二人挈手隨後問之曰臣父嘗
餓且死君下壺飡哺臣之父故來死君也中山君曰吾
以一椀羊羹亡國以一壺飡得二士死

戰國策

殺翁分羹

楚與漢相守羽乃為高祖置太公其上告漢王曰今不
急下吾烹太公漢王曰吾與若俱北面受命懷王約為
兄弟吾翁即若翁必欲烹而翁幸分我一杯羹項王怒

欲殺之項伯曰且為天下者不顧家雖殺之無益也

嫂轅金羹

見嫂叔門

羹爛汝手

見德量門

以羹相戲

殷淳子孚有父風嘗與侍中何曷共食孚羹盡曷云益
殷尊羹曷司空無忌子也孚徐輟筋曰何無忌諱

千里尊羹

陸士衡詣王武子武子有數斛羊酪指以示陸曰卿東

吳何以敵此陸云千里蓴羹未下鹽豉

郭子

不二羹齋

唐柳玘家戒余先君兄弟三人皆居清列非速客不二羹齋各食齏菹而已皆保重名

古今文集

古詩

乞食

陶潛

饑來驅我去不知竟何之行行至斯里叩門拙言辭主

人解余意遺贈副虛期譚諧終日夕觴至輒傾盃情欣
新知懽言詠遂賦詩感子漂母惠愧我非韓才銜戢知
何謝冥報以相貽

陶淵明得一食至欲以冥謝主人哀哉哀哉此大類丐者
口頰也非獨余哀之舉世莫不哀也飢寒常在身前功名
常在身後二者不相待此士之所以窮也

志林

豆粥

以下
係粥

蘇子瞻

君不見滹沱流澌車折軸公孫倉皇奉豆粥濕薪破竈

自燎衣饑寒頓解劉文叔又不見金谷敲冰草木春帳
下烹煎皆美人萍蘆豆粥不傳法咄嗟而辦石季倫干
戈未解身如寄聲色相纏心已醉身心顛倒自不知更
識人間有真味豈知江頭千頃雪色蘆荻簷出沒晨煙
孤地碓舂秬光似玉沙瓶煮豆軟如酥我老此身無着
處賣書來問東家住卧聽雞鳴粥熟時蓬頭曳履君家
去

口數粥行

范至能

家家臘月二十五
浙米如珠和豆煮
大杓轆鐺分口數
疫鬼聞香走無處
鏤薑屑桂澆蔗糖
滑甘無比勝黃粱
全家團藥罷晚飯
在遠行人亦留分
祿中孩子彊教嘗
餘波徧霑獲與臧
新元叶氣調玉燭
天行已過來萬福
物無疵癘年穀熟
長向臘殘分豆粥

詩話

食粥

秦少游為黃本校勘錢穆父為戶書皆居東華門少游

春日有詩遺穆父云三年京國鬢如絲又見新花發故
枝日典春衣非為酒家貧食粥已多時穆父以朱二石
送之

律詩

係
羹

過子忽出新意以山芋作玉糝羹色香味皆
奇絕天酥酥醅則不可知人間決無此味也

蘇子瞻

香似龍涎仍釀白味如牛乳更全清莫將南海金齏膾

輕比東坡玉糝羹

食物

嗜好

羣書要語餼雜肉也腌漬肉也膳宗廟熟肉也

說文

脰者

俎實祭肉也生曰脰熟曰膳蓋社肉也

穀梁

熟肉有骨曰

穀大禱曰馘

釋文

肉腥細者為膾大者為軒

內則

珍用八物

注謂淳熬淳母炮豚炮牂擣珍漬熬肝膋也

周禮膳夫

觴酒

豆肉

坊記

窮口腹之欲不能反躬天理滅矣

禮

魚鼈鱸鯉

月民之失德乾餱以愆

伐木

肉之羞者猩猩之唇

呂氏春秋

封

熊之掌翰音之跖燕髀猩唇髦殘

髦獸名所食之殘也

象白

張協七命

紫駝之峯

見駝門

魚我所欲也能掌亦我所欲也

孟

膾炙

與羊棗孰美

孟

食前方丈

孟

享有體薦宴有折俎

左宣十六

有酒如坻有肉如陵

左

鼎臠盈望和致芳只

臠熟也芳椒姜也楚

晚食以當肉安步以當車

戰國策

攻苦食淡

漢呂后

疏厲

之食

鮑宣

不過一肉卮酒相對

張禹

人知

肉味即對屠門而大嚼

桓譚新論

金齏玉膾東南佳味

南部煙花

鼎臠俎載

柳

封腹割鮮

劉賓客文

詩句陶盤奉旨蓄竹筍羞雞炙韓紫駝之峯出翠釜杜

甲第紛紛厭粱肉杜黃雞啄黍秋正肥李桃花流水鰕

魚肥

張

酒殘欣賞牛尾狸

坡

古今事實

餒敗不食

魚餒而肉敗不食色惡不食臭惡不食失飪不食不時

不食不得其醬不食肉雖多不使勝食氣

論語

燔肉不至

孔子為魯司寇不用從而祭燔肉不至不稅冕而行不知者以為為肉也其知者以為為無禮也

列鼎而食

子路南游於楚列鼎而食

熊蹯不熟

晉靈公使宰夫臠熊蹯不熟殺之

肉食者鄙

齊師伐我公將戰曹劌請見其鄉人曰肉食者謀之又

何間焉。劄曰：肉食者鄙，未能遠謀。乃入見。莊

烹猴為羹

楚有烹猴者，而召其鄰人。鄰人以為犬羹，而甘之後，聞其猴盡吐瀉其所食，此未知味者。

食惟一肉

公孫弘為丞相，食惟一肉。

不重味

朱傳廉儉，自微賤至富貴，食不重味。按上不過三杯。

客知食物

曹元理善筭術嘗詣陳廣漢設食甚薄廣漢曰有倉卒客無倉卒主人元理以七箸著曰俎上蒸豚厨中荔支

何不設廣漢大驚

西京雜記

口腹累人

見猪門

預知食物

趙達嘗過知故取盤中隻箸再從橫之乃言卿東壁下

有美酒一斛又有鹿肉三斤何以辭無

吳志

五侯鯖

五侯不相能賓客不相往來樓護豐辯傳會五侯間各得其歡心競致奇膳護乃合以為鯖世稱五侯鯖以為

珍

西京雜記

供饌甚豐

晉武帝嘗幸王濟宅供饌甚豐悉貯琉璃器中

禁臠肉

晉元帝始鎮建業每得一豚以為珍膳項上一臠尤美

輒以薦帝羣下未嘗敢食時呼為禁臠肉

謝琨

一食萬錢

何曾日食近萬錢猶云無下箸處子幼奢侈每食必盡
四方珍饌一日之供以二萬為限北齊韓晉明好酒
誕縱招引賓客一席之費動至萬錢猶恨偷率

忍害物命

何胤侈於味食必方丈後稍欲去其甚者猶食白魚鮓
脯糖蟹以為非見生物擬食蚶蠣使門人議之鍾玩曰

鮒之就脯驟於屈伸蟹之將糖躁擾彌甚仁人用意深
懷如怛至於車鰲蚶蠓眉目內闕慙混沌之奇墮慙外
絨非金玉之慎不悴不榮曾草木之不若無香無味與
瓦礫其何等宜充庖厨永為口味

一食二韭

晉高陽王雍為相一食數萬錢李崇曰高陽一飯敵我
千日崇為尚書令富傾天下而性儉吝食常無肉止有
韭茹韭蘊人云令公一食十八種蓋二韭十八也

洛陽
伽藍

記

食牛心炙

見牛門

不食羊肉

齊王肅歸魏初不食羊肉及酪漿常食鯽魚羹渴飲茶茗汁高帝曰羊肉何如魚羹茶茗何如酪漿肅曰羊陸產之最魚水族之長羊比齊魯大邦魚比邾莒小國惟酪不中與茗作奴彭城王勰曰卿不重齊魯大邦而愛邾莒小國明日為卿設邾莒之會亦有酪奴因呼茗為

酪奴

洛陽伽藍記

對客獨飡

北齊崔瞻為侍御史在臺宅中送食備盡珍羞別室獨
飡有一御史姓裴伺瞻食便造焉瞻不與交言又不命
匙筋觀瞻食罷而退明日自携匙筋恣情飲噉瞻曰我
初不喚君食又不與君語遂能不拘小節昔劉毅冒請
鵞炙豈亦異是君定奇士每與同食

御史食雞

馬周每行郡縣食必進雞小吏訟之帝曰我禁御史食肉恐州縣廣費食雞尚何與榜吏斥之

以牛炙死

杜甫客耒陽游岳祠大水遽至涉旬不得食縣令具舟迎之令嘗牛炙白酒而死

棄饌直萬錢

韋陟性奢侈於饌羞尤為精潔每食畢視厨中所委棄不啻萬錢之直

饌不能名

唐裴冕性奢侈每廣會賓客不能名其饌

爛蒸葫蘆

鄭餘慶與人會食日高衆客皆餒呼左右曰爛蒸去毛
莫拗折項諸人相顧以為必蒸鸞鴨良久就餐每人前
下粟米飯一碗蒸葫蘆一枚餘慶餐美諸人強進而罷
東坡汁字韻詩却作盧懷慎豈其偶忘之耶

太平廣記
見泊宅編

設食唯菜

盧懷慎為黃門監兼吏部尚書卧病既久宋璟盧從愿
嘗相與訪焉懷慎卧於敝簣門無簾箔常器重璟及從
愿見之甚喜命設食有蒸豆兩甌菜數俎而已此外脩
然無辦

櫝食

杜鎬廣博為龍圖閣學士宋真宗問櫝食原於何代鎬
曰漢景帝為太子文帝鍾愛既居東朝文帝曰太子之
食必將殊勝乃命太官每具兩擔櫝以賜之此其始也

食必盡器

查道以謹儉率易為待制每食必盡一膳度已不勝則不下筯雖蔬茹亦然常曰福當如是惜

廊食無懼

張文定公齊賢河南人少為舉時貧甚客河南尹張全義門下飲啖兼數人自言平時未嘗飽遇村人作願齋方飽常赴齋後時見其家懸一牛皮取煮食之無遺宋太祖幸西都文定獻十策於馬前召至行宮賜衛士廊

食文定就大盤中以手取食帝用桂斧擊其首問所言
十事文定且食且對略無懼色賜東帛遣之

食可一大桶

張僕射齊賢每嗜肥肉數斤天壽院風藥黑神丸常
人不過服一彈丸公以五七兩為大劑夾以胡餅食之
罷相知安州與客燕食厨吏置一大桶竊視公所食如
其物投桶中至暮浸漬滿桶晏元獻清瘦如削每折半
餅以筋卷之抽筋就內捻頭一莖食之此亦異於人也

歸田

錄

嗜昌歠

以下係嗜好

周文王嗜昌歠菹

嗜羊棗

曾皙嗜羊棗曾子不忍食羊棗

嗜芰

屈到嗜芰有疾召宗老而告之曰祭我必以芰及祥祭宗老將薦芰其子屈建命去曰祭國君牛奠享大夫羊

士有豚犬之奠庶人有魚炙之奠籩豆簠簋上下供之不羞珍異不陳庶侈夫子以私欲干國之典

嗜酒

鄭伯有嗜酒

嗜魚

公儀嗜魚人獻不受曰吾祿自可致魚

嗜牛心炙

王右軍嗜牛心炙

古今文集

雜著

食箴

皮日休

皮子少且賤至於食自甘棗糲而已未嘗食於鄉里食於親戚食於州鄙有鄧邑大夫嚮皮子之名曾未相贄具厚羞以賓之皮子辭大夫訂之曰子自甘棗糲則可矣於鄉里親戚州鄙何有皮子曰一杯之食至鮮矣苟專其味必不能自抑既不能自抑日須豐其羞既日須

豐其羞則貧也不能無不足因是妄求苟欲之心生窮
貪極嗜之名生且大夫不能見前世之味禍乎故羊斟
不及華元受其謀黿羹不均子家肆其禍熊蹯不熟殺
宰夫而趙穿弑雙雞易鶩饋子雅而慶舍死嗚呼吾不
仁者乎誠賴其用所欲不可求所嗜不可得方自甘染
羈而已使我生於鍾鼎之家膏粱之門日縱異嗜年成
奇欲未必不為御者之奔華元也子家之伐靈公也晉
靈之殺宰夫也蘆蒲葵之殺慶舍也此猶之貪獸爭食

而死者矣故食於天子者則死其天下食於諸侯者則死其國食於大夫者則死其邑食於士者則死其家又焉能以鄉里親戚州鄙為讓乎大夫曰善自惟食之性不能自節亦由酒之性也復箴以自符箴曰

寧能我食不食於人既食於是食其身

老饕賦

蘇子瞻

庖丁鼓刀易牙烹熬水欲新而釜欲潔火惡陳而薪惡勞九蒸暴而日燥百上下而盪磨嘗項上之一臠嚼霜

前之兩螯爛櫻珠之煎蜜滷杏酪之蒸羔蛤半熟而含
酒蟹微生而帶糟蓋聚物之妖美以養吾之老饕婉彼
姮姜顏如李桃彈湘妃之玉瑟鼓帝子之雲璈命仙人
之萼綠華舞古曲之鬱輪袍引南海之玻瓈酌涼州之
蒲萄願先生之考壽分餘瀝於兩髦候紅潮於玉頰驚
暖響於檀槽忽累珠之妙唱抽獨繭之長縲閑手倦而
少休疑吻燥而當膏倒一缸之雪乳列百拖之瓊艘各
眼灩於秋水咸骨醉於春醪美人告去已而雲散先生

方兀然而禪逃響松風於蟹眼浮雪花於兔毫先生一
笑而起渺海闊而天高

國忌葷素食

來喻引范公說以為伊川所為范公未必盡知若率先
具素饌則應大與東坡忤何以能處程蘇之間而無違
言乎此則恐於事理皆未盡也至於國忌齋筵葷素所
宜則以范公之賢於已之所行自當顧義理之是非以
為從違不當視同列之喜怒以為前卻也使其果欲依

違兩間曲全交好則其素饌既忤東坡具肉食亦忤伊
川若慮於彼而忽於此則亦非所以兩全矣况范公之
意未必出此而他書所記亦云范醇夫輩食素秦黃輩
食肉則所記雖不同而范公之不畏東坡而每事徇從
亦當時所共知矣

朱元晦答呂
伯恭淵源錄

荆公無所嗜

老蘇辨姦初間只是私意如此後來荆公做不着遂中
他說然荆公氣習自是一箇要遺形骸離世俗底模樣

喫物不知饑飽嘗記一書載公於飲食絕無所嗜惟近者必盡左右疑其好也次日易以他物而置此品於遠則不食矣往往於食未嘗知味也至如食釣餌當時以為詐其實自不知也近世呂伯恭亦然面垢身污似所不恤飲食亦不知多寡以此等為姦恐不然也

朱語錄

脯鮓

羣書要語脯乾肉也脩脯也

說文

脯搏也乾燥相搏着也

脩縮也乾燥縮也

釋名

腊人掌乾肉凡田獸之脯腊臠胖

之事

禮周

婦之贄脯脩

禮記

牯乾雉鱠乾魚

周禮註

詩句秦烹惟芋羹隴饌有熊腊

坡

古今事實

束脩

子曰自行束脩以上吾未嘗無誨焉

賜脯遺母

趙宣子將之絳見翳桑之下有餓人宣子與脯二朐拜受而不敢食問其故曰臣有母持以遺之宣子更賜之脯二束而去

賣脯致富

濁氏以賣脯而連騎

漢唐

左慈酒脯

左慈詣劉表請犒軍有酒一器脯一盤萬人皆周而酒

器如故脯亦不減

神仙傳

擗麟脯

王遠至蔡經家與麻姑共設肴膳擗麟脯而行之

神仙傳

龍肉鮓

以下係鮓

陸機餉張華鮓華曰此龍肉也遂以苦酒沃鮓鮓中有
五色光機還問鮓主果云園中茅積下得一白魚狀殊
常以鮓過美

魚鮓寄母

孟仁為監池司馬自能結網手捕魚作鮓寄母母還之
曰汝為魚官而以鮓寄我非避嫌也

蛆鮓遺母

陶侃作漁吏以一蛆鮓遺母母以書責侃

詳見教子門

妄疑盜鮓

桑虞嘗行宿寄逆旅同舍客失脯疑虞為盜虞默然便解衣償之主人曰此舍數失魚肉鷄鴨多是狐狸偷君何以疑人乃將脯主山冢間尋求果得之客求還衣虞投之不顧

晉書

託鮓讒子

王瑩代謝超宗為義興太守與訓交惡超宗到郡後父懋往超宗處超宗設精白鮓美鮓獐巴懋問那得佳味

超宗詭言瑩始見餉佯驚曰大人豈應不得耶懋大忿
言於朝廷稱瑩供養不足坐失廢棄久之

饋蘆菹鮓

白樂天方齋劉禹錫饋蘆菹鮓

文集

古今文集

古詩

子魚

劉彥冲

舊聞通印名海錯珍莫踰火氣爍鱗鬣鹵香泛庖厨泥

泥子盈胞鮮美禍所區生如粒芥微多若囊粟儲他年
想吞舟勿輕此錙銖一咀命千百雖甘汝安無窮冬享
乳時罩麗海為虛含凍體猶濕得瀉味已渝虐戲等剗
孕淫刑幾戮孥人深襁褓恩在物愛豈殊聞風易殺子
盟水沉其軀詎有惻怛心旁推及豚魚相愛人獸均自
殘獸不如哦詩化蠻獠因警饕餮徒

謝吳春卿餉臘猪肉

見豬門

李聖俞求黃雀醢法戲作醢經遺之

見黃雀門

古今事文類聚續集卷十六